

續金華叢書



續金華叢書



金華黃
先生文
集

表勵準



甲春康宗校
子永胡楸鋟

黃學士文集序

翰林侍講學士金華黃先生文集總四十三卷其初稟三卷則未第時作監察御史臨川危素所編次續稟四十卷則皆登第後作門人王生宋生所編次也先生之文章刮劂燥雪如明珠白璧藉以纈綺讀之者但見其光瑩而含蓄華縟而粹溫令人愛玩歎息之不已而不知其致力之勤用心之苦也故其見諸朝廷簡冊之紀載山林泉石之詠謠無不各得其體而極其趣以自成一家之言不既甚盛矣乎余嘗論之文章與世運同爲盛衰或百年或數十年輒一見焉先生當科目久廢之餘文治復興之日得大肆力於爲己之學以擅名于海內雖其超見卓識有以異於人其亦適值世運之一盛也耶譬諸山川之風氣草木之花實息者必復悴者必榮蓋亦理執之必然者夫豈偶然而已哉先生領延祐甲寅鄉薦先文靖公實爲考官於師泰有契家之好其後同居史館又同侍經筵文誼爲尤篤比廉問閩南過金華得先生之集於王生故敘而授之三山學官俾刻梓以

惠來學先生登進士第授將仕郎台州寧海縣丞歷石堰塲監運諸
暨州判官浮沈州縣幾二十年始入翰林應奉文字尋丁外艱服除
改國子博士居六年以太夫人春秋高乞外補遂提舉江淞儒學年
六十有四竟辭祿歸養以中順大夫秘書少監致仕及終太夫人喪
年已踰七十矣復被召爲翰林直學士兼經筵官陞侍講學士中奉
大夫同知經筵事數告老不許久廼得謝去今年七十又九猶康強
善飲啖援筆騁馳如壯歲云至正十五年十月旣望朝散大夫福建
閩海道肅政廉訪使宣城貢師泰序

金華黃先生文集卷第一

初藁一

續金華叢書

五言古詩

臨川危素編次

番易劉耳校正

雜詩五首

日月東西行羣動亦不息寄身萬物中寧獨謝茲役所以魯中叟
遑遑走南北聖哲諒已然旅人能久宅

晨起步南園旭日朗以清葵花眾草中曄曄敷丹榮流光非汝私
獨爾心自傾覽物有深懷竚立方含情

璞玉與寶劍淪落初未偶君看被薊被各在千年後將身比金石
誰當獨長久悠悠百代下相知復何有

孤雲澹無心出山偶爲雨長風忽吹散渺渺歸無處唯餘向來山
突兀青如故懷哉魯仲連功成身已去
春風著萬物欣欣皆自私可憐兒女花榮悴更相持獨有澗底松
偃蹇如不知何疑楊執戟草玄髻若絲

效古五首

黃學士文集卷一
上山見明月下山月相隨月豈知愛我行自見之故山日已遠故人不可思殷勤謝明月願爾無時虧

女美眾所悅士窮世所輕輕重安足言泥盡水自清淮陽初寄食曲腰跨下行季子黃金多妻嫂來相迎自古已復然歎息空吞聲
擊石乃有火石火光不揚攀天亦有路天高路何長嗟峨萬古雲下覆歌哭場富貴誠足多貧賤不可忘

落花隨風吹各自東西飛花飛既不息水流復無極同生不同歸能勿異顏色木生則有枝豹死則有皮悠悠歧路間多言亦奚爲
飲酒莫盡醉盡醉無餘懽讀書莫弔古弔古多悲酸蕭艾蔽中野白露摧芳蘭鳳飢不得死鴟梟食琅玕去去復去去采芝青雲端

人事如草木

人事如草木一氣榮悴之外物何預人而寘喜與悲堂堂異姓王昔者跨下兒窮通本解后達者固不疑阮生亦隘人慟哭真奚爲

煌煌明月珠

煌煌明珠未害居濁水君看黃河黃豈解污清濟我方遺吾形寵辱齊一指懸知破琴戴未若摻搗礪

微雲翳白日

微雲翳白日羣動何喧喧嗚呼麒麟兒化爲猴與猿登高望四荒但見黃河奔誰哉派其流與我歸崐崙萎蕤青桂花霜霰日已繁豈不有桃李對之可忘言

古意

荆人初得玉跖足辭巖阿持獻萬乘君君門正嗟峨誰其尸國工謬以石見訶迷邦誠不忍欺君反同科臣口不自明臣心終靡它抱璞重再拜呼天淚滂沱淚盡血可續玉在良已多是事古則然嗚呼今奈何

連雨雜書五首

蕭蕭十日雨出門竟何之不愁道路難所懼沾我衣悠悠看屋梁作計誠已非有酒不解飲且遂哦吾詩

昔慕栗里翁頗復志耕耘偶入翰墨場抱筆學爲文偃蹇獨何成喧
嗽浪云云念彼荷簑子窮年愧其勤

虛堂坐無言繾綣悲宿昔常時眼中人已如不相識剝啄者誰子令
我喜折屐忽去已莫追一笑岸立幘

我思仇山人山川莽回互十書九不到木葉歲頻暮頗聞近移居併
失夢中路得無挈妻兒倒載入山去

今日曷不樂孤倡無與酬兀坐把書卷展玩不自休借問誰所爲其
人已千秋山雨政可聽撥書置牀頭

晚晴

洩雲散積雨林木含餘清披衣有奇懷偶從林叟行新晴遠峯麗夕
陰孤花明曠日固所虞聊茲息營營

夜歸

空山四寥寥落日翳榛莽蜿蜒草中逕躡屩度寒雨楠杉窈深黑忽
忽疑伏虎林窮澗水明稍聽歸人語

讀忠簡宗公遺事

公初起滏陽艱危屬多壘蒼然國家意委身干戈襄陽鱗卷翠華朔
雪被南紀悠悠虞淵日力盡揮不止寅恭秉齋鉞際會開朱邱長安
付馮異漢業中興始宮庭數汎掃蹕路無荆杞疚心望鑾輿感激涕
如水上表方出師嗚呼孔明死晏安不可懷肉食母乃鄙巨舟竟未
焚三語猶在耳蕭然舊祠下碧草垂階屺登堂挹光儀赤舄仍几几
千年墮淚碑一夫敢殘毀傳家有遺書敘事非虛美勗哉愼失墜庶
以裨信史

陪諸老夜飲

世故不可料忽若浮雲移生今百年內顛倒殊懽悲願惟我與公異
代同一時覽古旣深慨撫今亦餘噫長川去悠悠青山暮委蛇向來
遠遊意我行方遲遲咄哉有志士卒歲恆寒飢况復託渺茫欲與千
載期盈虛信天運廢興豈人爲願公姑舍是一觴聊可持

曉行湖上

曉行重湖上旭日青林半霧露寒未除鳬鷺靜初散
黃緣際餘景閃倏多遺玩會心乍有得撫已還成歎
夙子丹霞約久茲芳洲畔獨往願易違離居歲方換
沙暄芷芽動春遠川華亂存期乃寂寞取適豈爛漫
小隱倘見招漁樵共昏旦

西峴峰

層雲抱春岑急瀨洩嵌竇修蹊入窈窕衆綠蔚以茂
名亭標水樂柱折荒碑仆幽尋得緇廬亂石扶結構
青精午堪飯碧澗寒可漱平生慕真賞及此成解后
冥探指絕頂有路忽通透緣蘿度蒙密翠氣濕衣袖
寄身萬物中下睨人寰陋清謳雜風竹大嘯落巖狖
東峰在眉睫可望不可就同遊却何時瑶草春已秀

夜興三首

秋氣入病骨殘夢愴然驚芭蕉葉間露風過皆成聲
攬衣沈寥內搔首天河橫飢蟲語不休中宵誰汝令
孤鴻亦何苦犯霜度微明悠悠念羣動百感忽我并
大化倘不爾吾其免營營

寒星挂疎林夜色翳餘暝雞聲驅行客出門路方永亦有山中人熟
睡方未醒而我立於獨婆娑玩光景一笑天宇青此意君自領

舉頭見殘月葉脫知深秋今我曷不樂歲月如驚鷗常憐古志士辛
苦歌飯牛空山夜漫漫政合秉燭遊臨風振吾衣蕭瑟不得留小立
殊復佳澗水鳴幽幽

陳生詩

陳生少也孤秉志何軒軒讀書奉慈母承顏郁春溫兀然處膝下不
問晨與昏叢叢萬井中陳生深閉門暉暉百花時陳生不窺園常恐
去左右或乖覆育恩一朝抱長痛飛霜墮秋萱鹽酪不入口日夜涕
翻盆欲娶弗及養矢言終不昏尙賴百歲後兄子父所孫朝來遊子
衣忽逐東風翻世方醉糟粕何庸薦犧尊陳生顧謂我是事安足論
幸託山水窟放情詠蘭蓀嗟今學步者觸險爭飛奔顧爾利鋤鏹深
斲六籍根願爾進竿牖高沂百聖源源長流自遠根大枝乃蕃勿搖
崔嵬筆誇作礫磈言引惟孝與弟百行茲其元咄哉行勿休日月方

云云贈言豈予敢情真覺辭繁匪爲陳生榮庶感薄俗敦

述懷

端居有多感求志無餘營夙違金門路緬愛丹丘名謬忝君子顧捧
身廁羣英卑栖念遠引窘步迷先征俛默敦宿尙低徊阻平生伏枕
勦中夜攬衣寄遐情上天廓澄穆列宿揚光晶俯視林木改仰悲鴻
雁鳴跂予秉微素十年守柴荆希世乖近務慕隱餘衷誠願言良時
晚庶保幽人貞

寄方子踐子發

窮居悵無遂徂歲聿載陰飛翹隕芳華候蛩厲哀音曾颺扇叢薄泣
露栖喬林撫景慨往古端操思繼今折蘭間幽佩解纓濯清潄石林
窅蔥蒨桂栢鬱蕭森遺世豈余敢匡時非我任覽已謝高軌卽事念
所欽纏綿阻道里緬邈眺崗岑委懷竚芳訊貽好在規箴

寄俞子易

間居寡歡豫枉駕忻周旋清言邁修夜朱火銷餘煙嘉會良不易鬱

抱罄所宣揆余徇微業春冬屢徂遷著徽忤往哲馳芳謝時賢睠茲
企三益揮袂增慨然杪秋淒且厲郊圻曠阡眠振飈捲飛藿積霧迷
遐川契濶歲復流瞻望情所牽存期尙勿奪輔仁庶不謬紫芝無新
曲白駒有遺篇失心遂招要贈言比芳荃

東園晚歸

興忍嬰近務超遙愛佳辰興言望東菑良苗藹津津鄙人昧時趨曠
途夙所遵幸遠簪組累稍欣田園隣兀兀登故畦悠悠睇城闔理穢
出新竹撼枯落荆薪夕日逗遠川餘暉散衣巾疊疊觀物變依依念
農人渠渠長者言惻惻非賤貧

送凌吉叟杭州教授

浙水西八州維杭實名都古來萬人海逐逐無賢愚况茲百年後淳
朴古不如翩翩誰家兒白馬驕路隅春風樊樓醉一笑百斛珠亦有
朱門家齊謳間吳歛綃綺散煙霧續紛被僮奴可憐彼蚩蚩久爲紅
塵驅頽俗如波瀾孰障羣流趨又如敗屋壁風雨須人扶博士非冗

官豈卽無良圖當令歌舞場化作弦誦區行矣徇所務辭章信其餘
春風摻別衣晴沙秀寒蘆何以贈子行白雲不可呼聊持狂者言用
比貂襜褕

送朱仲山之京

騏驎出渥洼意欲周八極芻豢豈不多未便甘伏櫪念君抱耿耿坐
視暄涼易忽辭白髮親去作青雲客應恐鄧仲華笑爾長寂寂鄙人
屬有念未辦經世策青燈雨如綫窮巷方偃仄懸知操斧斤不必昵
檣櫟往哉布汝懷庶用副前席勿云萬戶侯自可談笑覓百年滔滔
內岐路足南北出處會有爲聚散奚暇惜歌我辛苦詞送子遠行役
崢嶸壯士志慘澹遊子色那無平生期慎爾保金石莫將賈生淚先
爲離別滴

贈葉審言別

昔人稱好士乃有黃金臺黃金亦何物顧用驕賢才葉君被短褐志
力何雄哉北斗叫閭闔紅雲指崔嵬終然無苟售自保同嬰孩車服

非吾榮黃金直浮埃十年今何官茅屋歌蒼苔豈無琅玕樹鳳飛故
低徊一朝脫身去歛觀雲路開葉君善自愛往矣無嫌猜迷邦古所
誚豈弟貴不回願言吐奇肖落落排風雷尙念窮賤者衡門守蒿萊
我舟合江潯水清石額額念此殊可嬉如何有行役沙頭白髮翁捫
蝨了晨夕茅茨八九椽終歲閱過客

曉望

城頭鷄鳴曙起坐理冠幘閒窗寫遙望煙霧竟川澤喧喧市聲動漠
漠井氣白如何山中人歲莫塵埃客

晚泊釣臺下

四山環一水遺臺故巘岬那無漁樵居政復不敢安舍舟衝微雨憑
軒俯清灣念昔乘興來無從寄遊觀今我有行役乃爾容躋攀山靈
豈愛我爲解塵土顏落日奠蘋藻清風聞珮環幽尋不可極林暝吾
當還却去望層碧孤舟生晚寒